

Incumbensa da la fracziun da la PLD concernent la realisaziun da la Lescha da polizia tenor la revisiun parziala da l'onn 2018 (emprim sutsegnader Pfäffli)

Ils 26-05-2021 ha la Polizia communal da San Murezzan inoltrà al Departament da giustia, segirezza e sanadad (DGSS) ina dumonda da survegnir la cumpetenza da dar multas en chaussa da la Lescha da narcotics (LN) tenor la glista da multas 2. Ils 8-07-2021 ha il DGSS refusà questa dumonda cun la suandanta motivaziun:

«Sut tschertas circumstanzas pon incumbensas da la Polizia chantunala vegnir transferidas en il cas excepziunal per contract e cunter indemnizaziun a las vischnancas. In tal transferiment è fin ussa vegnì fatg exclusivamain a la polizia communal la pli gronda, numnadamain a la Polizia da la citad da Cuira, ed è in'exceptiun, er pervia da las structuradas creschidas istoricamain. Cun approvar il rapport «Polizia dal Grischun 2015plus» ha la Regenza concludì tranter auter da restar tar il model existent da l'organisaziun poliziala. Quai vul dir ch'i vegn renunzià da stgaffir ina polizia unitara ed uschia er desistì da privar las vischnancas da lur cumpetenzas existentas. Però parta il rapport dal fatg che – cun exceptiun da Cuira – las ulteriuras otg vischnancas che han in'atgna polizia vegnian – a vista mesauna – a surdar facultativamain lur incumbensas a la Polizia chantunala. La Regenza vul lura bain er promover questa soluziun da contract, en spezial en il rom da fusiuns da vischnancas e da la regiunalisaziun d'incumbensas communalas. Ulteriuras exceptiuns analogas a quellas da Cuira n'èn ni planisadas ni existan las premissas necessarias per quai.»

Questa motivaziun stat en ina clera cuntradiziun cun la revisiun parziala da la Lescha da polizia, ch'è vegnida tractada dals 29-08-2018 fin il 1-09-2018 en il Cussegl grond ed alura concludida, ed ignorescha sapientivamain ils votums clers e nets dal represchentant da la Regenza e da differents commembers dal parlament, ch'èn vegnids protocollads en la debatta correspundenta. Uschia è il cusseglier guvernativ competent Rathgeb s'exprimi per il protocol concernent il rapport da polizia 2015, concernent la strategia ed il futur da la Polizia communal sco er concernent sias incumbensas respectivamain cumpetenzas, sco suonda:

«Là avain nus sclerì la dumonda centrala, sche nus vulain lavurar vinavant en il chantun Grischun cun in sistem dual ed avain uschia [...] mess giud maisa il tema da la polizia unitara. [...] Quai vul dir, nus avain in sistem fin da cumpetenzas ch'èn equilibradas bain tranter il chantun e las vischnancas. Nus empruvain da consolidar quai cun questa revisiun parziala, senza tanger las cumpetenzas da las vischnancas, schizunt anc da las estender in zic ed alura prender soluziuns individualas. [...] E nus avain ina regulaziun da basa per alura dar la paisa necessaria als basegns individuals da las vischnancas [...] sin plaun d'in contract. E jau sun da l'avis che quai è in model excellent che tegna quint dals basegns dal chantun e da las vischnancas il qual nus cementain cun questa revisiun parziala ed il qual regla tschertas dumondas als puncts da contact. Ma anc ina giada: quests puncts da contact restan natiralmain adina en in chantun che viva quest model dual. Nus vivain quest model, nus al sustegnain cleramain e nus al vulain viver er en l'avegnir (protocol dal Cussegl grond 1/2018/2019, p. 87).»

Medemamain è s'exprimi il president da la cumissiun da quella giada, il deputà Crameri:

«Dal rapport da la polizia [...] resorta l'enconuschientscha ch'i duai vegnir renunzià definitivamain d'introducir ina polizia unitara en il chantun Grischun, quai vul dir d'integrar las polizias communalas en la Polizia unitara (protocol dal Cussegl grond 1/2018/2019, p. 80).»

Er concernent la surdada d'incumbensas ha il president da la cumissiun explitgà cleramain:

«Cas cuntrarì pon [las vischnancas] ademplir sezzas incumbensas dal chantun. Per quest intent dovran ellas però ina basa contractuala cun il chantun tenor l'art. 5 al. 3 e 4. [...] Ils obstachels per surpigliar incumbensas chantunalas sco talas tras las vischnancas na dastgan betg esser memia auts. Ord vista da las vischnancas vegn spetgada ina tscherta bainvulientscha da vart dal chantun (protocol dal Cussegl grond 1/2018/2019, p. 90).»

Sut quest aspect vegn la Regenza incumbensada da procurar ch'il DGSS sa distanzieschia d'ina interpretaziun inexacta dal rapport "Polizia grischuna 2015", che la revisiun parziala da la Lescha da polizia da l'onn 2018 vegnia exequida ed applitgada correctamain e che las opiniuns respectivas e las incumbensas correspundentas da la legislativa dal chantun Grischun na vegnian betg ignoradas vinavant, mabain acceptadas e realisadas.

Cuira, ils 27 d'avust 2021

Pfäffli, Marti, Michael (Castasegna), Alig, Bigliel, Censi, Claus, Engler, Felix, Flütsch, Giacomelli, Hartmann-Conrad, Hitz-Rusch, Hohl, Holzinger-Loretz, Jenny, Jochum, Kasper, Kienz, Kunz (Cuira), Kuoni, Loi, Mittner, Natter, Niggli (Samedan), Papa, Rüegg, Schutz, Stiffler, Thomann-Frank, Thür-Suter, Valär, Waidacher, Weidmann, Wellig, Wieland